

218 Atlit UMP Bersaing dalam Sukan MASUM



Kuantan, 27 Ogos - Seramai 218 atlet Universiti Malaysia Pahang (UMP) menyertai Karnival Sukan Majlis Sukan Universiti Malaysia 2015 (MASUM) yang kini sedang berlangsung di Universiti Teknologi Malaysia (UTM), Skudai Johor sehingga 7 Ogos nanti.

UMP mengambil bahagian dalam 15 acara sukan iaitu Petanque, Taekwando, Bola Keranjang, Sepak Takraw, Pencak Silat, Bola Baling, Bola Jaring, Bola Tampar, Karate-Do, Memanah, Catur, Woodball, Futsal dan Lawn Bowls.

Majlis penyerahan bendera universiti disempurnakan oleh Naib Canselor UMP, Prof. Dato' Dr. Daing Nasir Ibrahim kepada wakil kontinjen lelaki, Fauzi Musa dan Lailatun Qadrina mewakili kontinjen wanita dalam majlis yang berlangsung di Dataran Kompleks Sukan UMP Gambang di sini baru-baru ini.



Dato' Daing Nasir berkata, dengan semangat kesukanan yang tinggi beliau percaya UMP mampu bersaing dalam karnival tersebut di samping memelihara imej dan nama baik universiti itu.

UMP memilih sebanyak 15 daripada 25 acara sukan yang dipertandingkan berdasarkan kebolehan dalam sukan tersebut. Katanya lagi, dalam dunia sebenar kita tidak dapat lari dari pertandingan samada dalam sukan, pelajaran, kehidupan, kewangan dan lain-lain lagi. Namun, pertandingan ini akan menjadikan kita sentiasa bersaing untuk meraih kemenangan.

Menurutnya, menang atau kalah adalah adat pertandingan, namun diharapkan para atlet menyahut cabaran dengan menunjukkan kesungguhan sepanjang kejohanan tersebut.

"Pihak pengurusan UMP sentiasa memberi perhatian terhadap pembangunan sukan di universiti melalui inisiatif yang digerakkan oleh Pusat Sukan UMP dan mengharapkan barisan atlit dapat memberikan pencapaian yang terbaik dan mengambil manfaat daripada karnival ini untuk berjumpa dengan rakan dari universiti lain seperti membina karektor dan semangat kesukanan," katanya.



Dalam pada itu, Ketua Pusat Sukan UMP, Aznorizamin Ismail berkata, karnival tersebut untuk memupuk semangat setia kawan dan mengeratkan silaturahim antara penuntut universiti dari seluruh negara. Katanya, sukan ini juga menjadi platform yang dapat merealisasikan hasrat UMP melahirkan lebih ramai penuntut yang aktif dan berdaya saing.

Menurut Fauzi Musa yang merupakan atlit memanah UMP yang turut mengetuai bacaan ikrar para atlit UMP mengharapkan kepulauan mereka nanti dapat meraih emas seterusnya mengharumkan nama universiti.

Hadir sama Timbalan Naib Canselor (Hal Ehwal Pelajar Dan Alumni), Prof. Dato. Dr. Yuserrie Zainuddin dan Pensyarah Fakulti Sistem Komputer dan Kejuruteraan Perisian (FSKKP), Rahiwan Nazar Romli yang merupakan Pengurus Pasukan Bola Sepak UMP.

Disediakan Unit Perhubungan Awam, Bahagian Komunikasi Korporat PNC

Posted By : SITI SARAH BINTI MOHAMAD RAJIMI Date Posted : 29-07-2015, 17:03:55